

廣州府志卷一百四十二

列女一 南海

南朝宋

戎士陳南妻丹者戴氏之女美而早寡事舅姑恭篤同伍之人咸樂其賢色求者甚多守死不嫁後之聘者告其軍主軍主命之知不得已乃自經死元嘉十六年刺史陸徽為建坊

據戴通

志修

美人區氏良家子也昇明中父金以義士從大將鄧惠真襲豫章賊帥有功入金陵事齊高帝為右武衛校尉會選良家子區氏以美姿儀封為美人性婉順事高帝始終寵遇不衰而金亦榮顯官至尹州刺史

據黃通

志修

唐

廣州府志卷一百四十二

列女一

七歲女子武后時其兄進至京后命賦別兄詩即曰別路雲

初起離亭葉正飛所嗟人異雁不作一行歸 據大清一統志修

南海女子不知姓氏作顰鑑圖凡一百九十二字藻麗反覆

文字縈迴句讀曲屈韻調高雅有陳規起諷之意可以作鑑

前列輝映將來洵仙才也 據阮通志修

顰鑑銘 一名轉輪鉤枝八花鑑銘

清月曉河澄雪皎波 月曉河澄

雪皎波清 曉河澄雪皎波清月 波清月曉河澄雪皎

清波皎雪澄河曉月 波皎雪澄河曉月清 皎雪澄

河曉月清波 雪澄河曉月清波皎 右花上八字環旋讀之得十六句

清光耀日菱芳照室 光耀日菱芳照室清 耀日菱芳

照室清光 日菱芳照室清光耀 清室照芳菱日耀光

室照芳菱日耀光清 照芳菱日耀光清室 芳菱日

耀光清室照

右花上八字環旋讀之得十六句

篇章隱約雅合雍熙鉛

華著飾盡瘁妍媸旋軀合配懿德章施宣光炳耀列象標

奇先人後己閱禮崇詩懸堂象設啟匣光馳傳芳遠古照

引毫釐堅惟瑩澈跡異磷緇連星引月藻振芳垂妍齊錦

繡色配漣漪虔思早暮守謹閨闈圓虛配道象罔齊儀烟

凝綴玉影表芳枝捐瑕滌怪釋怨忘疲蓮芳表質日素凝

姿編辭衍義質動形隨前瞻後戒雪拂雲披聯翩動鵲映

掩辭螭蟬輕約鬢柳翠分眉全斯節志敬爾尊卑鮮含翠

羽影透輕池源分派引地等天規延年益壽代變時移筌

簡等義繪絲分詞

謹案是銘載 欽定全唐文因附錄於此

宋

廣州府志 卷一百四十二

列女一

二

劉氏二女家城西之折桂坊其母久病一割肝一剔股以奉

之母乃瘳連帥龔茂良上其事詔即所居立雙闕乾道中時

事也今西城有雙闕遺跡焉 據戴通志修

鄧六娘宋寶慶上舍夢槐女景定解元伯瑜女弟也父母蚤

喪兄嫂繼亡止遺孤姪履元甫一歲無族屬可倚六娘日夜

哀痛念鄧氏宗祀不絕如綫矢志不嫁撫育履元成立後膺

封爵為忠翊校尉以昌鄧氏後者六娘之功也祀貞孝祠 據廣州貞烈傳修

州貞烈傳修

吳妙靜助教道遺女許嫁新會李氏子李親迎渡龍江覆舟

死妙靜誓不適人出嫁貲建大石橋於李溺死處後人呼為

老女橋上有老女墳督學蔡克廉題曰宋貞女吳氏之墓 據

泉文集修

鄉貢士劉元妻周氏宋季爲強賊所逼周紿之曰當盛服以從賊以爲然卽乘間投蘭石海而死七日尸浮倚於石衣裾整然子孫遂於其地建祠據黃通志修

陳葵娘張槎原孀也原孀歿妻潘氏年二十七鞠遺嬰子寬旁無期功親葵娘撫膺曰陳氏數世祇此呱呱一綫脈子若締盟他族則藐孤將誰與保乎因不字以堅嫂志而閉戶績紡同顧復之俾底於成及葵娘卒葬諸兄嫂之旁宗族至今恆德之據南海志修

明

王受祖妻萬氏洪武初蘇友輕作亂萬爲官軍所獲獻於南海衛指揮盧諸諸愛其美欲納之不從諸怒以刃揮之萬唾罵不絕死於南門外據黃通志修

廣州府志

卷一百四十二

列女一

三

陳復亨妻李氏夫早卒守節以終洪武十八年旌表據張府志修

女官黃惟德洪武二十年選入宮命爲司寶永樂初信任益隆宣德七年乞骸南歸太后作圖且爲詩賜之其姪女卽大學士梁儲母也據黃通志修

邵祖德妻莫氏生子康惠未幾寡康惠旣長娶梁氏生子智未幾康惠又卒梁與姑皆孀居無玷鄉人以雙節目之智後

官御史莫以景泰癸酉旌表梁以成化十年建坊其後有洗

茂妻陳氏姑媳並以節行聞又有李大妹幼喪父母孀守依母不嫁據阮通志修

陳璵妻張氏于歸踰年舉子甫三月璵亡備嘗荼苦矢志無他從兄知府淮欲聞之有司張曰吾分也焉用此年八十五

卒梁儲爲傳其事據張府志修

陳氏大欖民人妻夫早故守節終身成化二十二年旌其門

同上

孝廉周禮妻鄒氏適禮歲餘生子泰而禮卒里黨憐其貧勸改適鄒泣曰姑老子幼忍使無依耶奉姑益勤誨子成立後孫文興文明鶴年皆領鄉薦孀居六十三年督學樊倣旌其門元孫牲亦領崇正己卯賢書

據廣州貞烈傳修

吳貫之妻鍾氏年十九而嫁未十月已孕貫之病革語曰子死靡悔第二喪未葬汝年少異日尙儷他族縱得一孤又安能保况產業門戶耶鍾涕泣曰君生平好善天道必祐萬一有此妾安敢二心及貫之卒生遺腹子昕杜門紡績教以儒業竭力營葬三喪靡有遺悔宏治二年旌

據黃通志修

廣州府志 卷一百四十二

列女一

四

母欲悔親女不可事遂尼濂尋領正德庚午鄉薦赴春官中乙榜南歸道卒訃至父母將為別字女毅然曰一身可許兩姓耶沐浴整妝自經於閨時年二十有二云

據泰泉集修

梁能妻霍氏能客死潮州遺腹子商霍紡績撫孤事姑尤孝四十年如一日嘉靖元年督學魏校廉得其實旌焉更為立

傳 據黃通志修

百戶陶壯妻倫氏狀元文敘女榜眼以訓妹也年十八適壯克盡婦道二十四而夫奉使粵西卒倫矢志守貞白首甘節嘉靖間知縣熊坦上聞都御史談愷中丞孫永思表之曰瑤

林白璧臨川曾佩書為請旌於朝

據廣州貞烈傳修

生員蒙天祐妻周氏祐死周年二十二遺腹生男鑑父母欲奪而嫁之周矢不再適事姑撫子捐簪珥以完喪葬嘉靖十

年事聞御史吳麟遣禮存問十三年御史戴璟具題旌表戴

通志

陳紹雋妻馮氏年二十二夫亡撫一子居喪守禮矢志無他

紡績教子成立卒年八十嘉靖辛卯旌據張府志修

儒士方闔妻陳氏事姑張氏得其歡闔沒陳氏二十八遺孤

僅五齡勵志守節姑病篤籲天請代姑沒脫簪珥以營殯葬

嘉靖十五年表其閭卒年七十五據阮通志修

伍雍妻張氏雍卒於都下張年僅十九訃聞矢志不貳孝事

舅姑撫孤成立年七十五卒嘉靖辛酉督學林雲同建坊旌

之據張府志修

舉人龐一訊妻楊氏一訊領嘉靖庚子鄉薦任臨清學官生

子鍾魯百日而一訊歿楊年二十餘矢志守節茹貧訓子足

廣州府志卷一百四十二

列女一

五

不履戶外卒年七十同上

何道養妻霍氏年二十孀守五十餘年勵志苦節遷居仁里

訓子課孫孫仲行登嘉靖壬辰進士同上

葉珪妻彭氏燦女也生男純而珪歿時年二十有三誓志守

節事姑潘盡禮嘉靖二十八年旌建坊於蛇龍村據黃通志修

梁希賢妻凌氏聰次女歸踰年生子珩越一月而夫亡舅姑

憫其年少諷之再適凌矢志不二為婦愈孝舅姑逝捐衣飾

完殮珩早故遺孫八齡凌垂白鞠之部使者請表其閭嘉靖

三十二年卒年九十五知州梁顯誌其墓據阮通志修

倫重妻黎氏嫁僅三月而夫故舉遺腹子彝矢志撫之甘貧

茹苦人罕觀其面彝長遊府庠嘉靖三十九年事聞旌其家

據張府志修

黎邦宇妻陳氏邦宇補弟子員未幾卒陳年十九守志不移
嘉靖癸亥督學樊倣旌表

李偉妻何氏事夫兩載生男百日而夫亡何守節食貧事翁
存孤鄉里稱賢請建坊表之俱同上

曾觀祐妻陸氏年二十一而寡遺孤表甫一齡嘉靖中旌其
門據金通志修

宋士志妻黃氏生一子而夫卒黃年二十守志教子始終嚮
然詔下所司建坊旌其貞節據張府志修

陳仲益妻黃氏仲益舉於隆慶丁卯寢疾歲餘黃侍湯藥衣
不解帶及夫卒哀毀骨立遂矢志孀守執女紅以自給藜藿
含糗甘貧教子同上

李天總妻劉氏歸二載生子浩彌月夫卒矢志自守事姑訓
廣州府志卷一百四十二 列女一 六

子艱苦備嘗及浩長貧不能娶里人歐陽光妻以女未幾浩
又卒歐陽竭誠盡孝食必先姑喪葬盡禮隆慶五年御史楊
標上其事詔旌節孝據郝通志修

庠生蔡紀妻龔氏男果婦黃氏姑婦皆青年守節白首如一
龔遇荒採桑子自食留米以奉姑訓子無贄勤紡績以佐之
黃于歸四載而夫亡姑病脫簪珥延醫及歿典衣衾以完喪
葬萬曆壬午御史梅澹奏請坊表書額曰一門雙節據廣州貞烈傳修

關元道妻盧氏適元道三載生子本雍歲餘夫亡年二十二
撫孤守節足不踰閭事舅姑以孝聞時值凶荒令本雍捐穀
賑恤縣以尙義旌之年踰七十萬曆十六年御史蔡夢說具
題表其閭據郝通志修

周氏女幼許聘區姓未嫁夫死女持服三年誓不他適家貧甚紡績自食六十年如一日御史蔡夢說為請旌後女族裔周演貞聘灣頭林氏女演貞死林往執喪哀毀盡禮奉翁姑克盡孝道人以為周貞女風化云同上

廖廷綺妻余氏廷綺補弟子員未幾卒余年僅二十守節不二萬歷丁亥御史蔡夢說旌之同邑鄧茂瑛妻鄒氏年十九夫亡守節萬歷己丑知縣段克允表之區曰節孝據南海志修

方存業妻譚氏生子觀光三月而存業亡悲號欲殉母與姑憐而止之且諷改適譚泣曰吾久不樂生惟姑與兒在念耳哽噎不止母與姑無敢復言迨觀光七歲遣就塾竊自計曰吾今可以遂志矣中夜就縊里人傷之公舉以聞萬歷十七年旌據廣州貞烈傳修

廣州府志

卷一百四十二

列女一

七

梁紀慶妻周氏紀慶墮崖死周矢志養姑比姑卒貧不能葬

因併夫柩焚之薪既熾奮身躍入焰中死

據大清一統志修

贈員外郎梁棟妻李氏年二十二而棟客死時子在襁褓貧

無生產惟紡績奉姑育子足不踰戶者四十餘年以子炫貴

封安人萬歷壬辰制府劉繼文具題旌

據金通志修

葉宗穆妻鄒氏年二十夫殞誓不他適男樹勳甫襁褓姑年

六十貧甚紡績以支垂二十餘年樹勳後補弟子員萬歷間

學使袁茂英匾以淑節御史李時華表其閭年八十餘卒據張

府志修

百戶范瑛妻陶氏瑛死於兵陶撫孤守節子震成立襲先職

及陶卒布政使陳選行題曰貞節范安人陶氏之墓

據郝通志修

李澤妻梁氏于歸六載澤歿梁年二十四撫孤子承問後為

忠義衛經歷姪待問特疏上聞旌表卒年七十有七據廣州貞烈傳

黃振東妻湯氏年二十四生子挺俊百日而夫亡遺囑令改適湯翦髮誓欲殉姑指其子曰縱不念姑獨不念此乎懼傷姑意乃止蓬首垢容諸妯罕覩其面及挺俊成立有子五人湯指曰汝不負未亡人未亡人負而父矣猶哽噎久之四十餘年卒據金通志修

庠生霍若琪妻方氏年二十四若琪卒遺子蒙拯毀形截髮誓死靡他雖身出宦門日事紡績編衣蔬食三十餘年不問戶外事蒙拯萬厯乙卯登賢書官知州孫師乾亦領崇正癸酉鄉薦皆方式穀所貽也天啟二年有司題旌卒年八十五據廣州貞烈傳修

廣州府志 卷一百四十一 列女一 八

贈承德郎謝之屏妻何氏貞靜端重治家有法年十八歸之屏十載而之屏卒何毀妝茹苦矢志柏舟足不踰閩者四十年訓孤雲虬登己未進士有司題請坊表累贈安人同上

何妙慧錫有女賦性端肅少即持齋蔬食受聘陸家未歸而陸歿妙慧年十六啗指自誓不改婚父母不能奪孀居四十年節操彌厲分守道王勳表其門據郝通志修

龐秉綱妻勞氏年二十一生一子秉綱亡毀容守節家貧傭指以度無怨也鄰婦諷之再字勞剝髮啗指曰未亡人不即從夫地下以衛孤耳遂杜門與鄰婦絕冰操凜凜子長受室亦早逝暨媳洗氏熒熒孀守撫孫成立年七十有一有司旌表之據廣州貞烈傳修

岑氏二烈女一名蟬姐刺史昌運季女一名二媛文學廷器

次女俱年十六性孝淑被寇圍樓焚劫度不可免二女相抱從容赴火死

馮希聘之妻吳氏夫亡遺腹產女潔白自持以節行著女稍長受高日煥聘未婚而日煥死女請歸高守節母難之女泣然曰為節母女而聘二姓不亦愧乎母從之匍匐往哭甚哀請於翁姑曰夫今有婦非殤也請冠而殮他日可定繼嗣許之隨脫簪珥備棺具出所織帛製衣襟加冠于首躬為含殮既殯辭歸母家筭而後返事舅姑以孝檢身以禮綦履不踰閭閻立夫弟子為嗣卒年六十三俱同上

主事馬拯妻陳氏拯以妙齡擢解連登制科歸娶未幾卒于任陳年僅十八扶舉歸葬撫一孤女孀居矢志不渝萬厯甲

申具題旌表據張府志修

廣州府志 卷一百四十二 列女一 九

郭尚傑妻龐氏年十七適夫家徒壁立以女紅佐衣食未幾夫亡撫一女矢志孀守母勸之改節不從萬厯乙巳督學朱燮元請旌

馮楚妻陳氏馮塾妻劉氏楚塾皆庠生蚤逝陳暨劉孀苦如一陳則萬厯年間御史梅澹旌之劉則督學朱燮元旌之

庠生盧禮妻梁氏福建布政使夢陽子婦也禮早終梁矢志不渝萬厯間知縣王循學贈匾曰名門節孝俱同上

嚴承祖妻駱氏羅憲忠母劉氏俱夫亡守節終身又陳以經妻杜氏年二十守節院道給匾曰純節據南海志修

邵其觀妻陳氏歸三載而夫亡無嗣年甫二十家貧守節事舅姑至孝喪葬畢乃依父禹謨居矢志不移以從子昌和為後生甫彌月擇乳保撫終以成家孀居四十餘年內外肅然

年六十餘卒據張府志修

龐允迪妻劉氏允迪卒劉守節撫繼子馬圖長遊于庠同上

劉祖滿字蘭雪生員何允衍妻也天性孝淑聰慧好讀書善

吟咏年十四母日忽瞽禱以身代夜夢神誨以燃指覺如神

誨痛仆於地母驚捫抱大哭兩目遂開人以爲純孝所感云

年僅二十四卒有梅粧閣叢桂軒稿其詩莊雅典麗得性情

之正直指王化澄太守嚴起恆旌之據廣州貞烈傳修

龐尙誥妻李氏年十九而孀子甫三月撫之成立卒年七十

九據張府志修

庠生陳應龍妻唐氏孝廉憲長女年十六于歸十載而寡應

龍有妾與唐各有一子皆僅逾歲矢志靡他事姑及祖翁以

孝謹聞妾亡撫妾子如己子長分產悉均之治家嚴課兩孤

廣州府志卷一百四十二 列女一 十

成立年八十卒孫敏性敏勉相繼登科目

儒士黎彝蕭妻倫氏副室葉氏彝蕭早逝倫年二十七葉年

二十一葉子烈斌甫三歲倫與葉哀毀誓殉以翁慰勉乃忍

淚共矢柏舟事翁暱勉菽水翁卒鬻釵襄禮和熊訓課克成

夫志烈斌中庚午副貢

李日新妻陳氏歸半載日新歿陳孀守二十餘年力襄夫喪

築兩壙以待同穴歲有孤燕巢於寢牖陳卒之年燕不復來

黎肖孔妻陳氏年十九歸孔三載生一子纔七月而肖孔亡

陳苦節蠶織供養翁姑撫訓孤兒年逾六十猶朝夕親供其

姑不懈守志四十餘年

陳素儒妻李氏年二十七夫亡矢志守節撫孤毓瓚長補弟

子員爲娶婦龐氏知縣一德女孫也無何毓瓚復夭遺一子

甫四齡遂含泣與婦共撫守之既而孫又殤龐悲痛絕粒死時李逾六旬垂白而孤苦益甚見者憐之俱同上

指揮歐鏜聘妻黃氏庠生鶴鳴女未婚鏜死女誓死歸歐守喪不嫁據甘泉文集修

霍蒙擢妻陳氏年十九歸蒙擢三載夫亡一子甫二歲復有遺孕陳痛甚欲殉兩代孀姑再三泣慰之乃已尋產遺腹女終身孝養得兩姑懽心年九十一卒據張府志修

龐瑞穆妻霍氏年二十歸瑞穆甫六月而孀矢志不二五十年不炫飾不衣帛節行凜然年七十終據廣州貞烈傳修

羅氏女許字陳善昌將婚而善昌天羅聞訃至夫家殯殮如禮事舅姑克盡婦道終身不出門閫不茹葷酒紡績度日年五十一卒據金通志修

廣州府志 卷一百四十二 列女一 七

廕生潘仕松妻李氏戶部尙書待問女刑部尙書濬子婦性慧敏有才畧崇正辛巳京師米貴眾兵缺食聚譁駭及戶部待問倉卒無計女見事急挾保母跨栗騮疾趨通州見漕艘三十餘銜尾而至歸報其父眾兵始散時年僅十三耳懷宗以軍餉不支勅諸臣助冊下戶部女見宮人吳湘繆瓊等皆脫簪珥自効女亦搜括釵飾進之年十八歸潘五年而寡甘貧教子年八十二而終據郝通志修

總兵都督同知陳鳴佩妻劉氏鳴佩鎮守廣西卒於陣劉聞訃哀悼絕食七日而死年僅二十有六詔賜祭葬贈一品夫人廕子震淋金吾指揮據金通志修

花節婦王氏夫廣州衛舍人病死王哀痛不欲生甫殯畢卽盛服與姻戚鄰里訣其日投井死張詡作節婦詞表彰之據郝

劉士斗妻張氏士斗偕之官成都崇正甲申闖賊破郡士斗罵賊死張偕其幼子以身殉僕御死者凡二十餘人

霍子衡妾莫氏子衡仕明為太僕卿丙戌赴池水死莫匍匐從之長子應蘭偕婦梁及其女次應荃應芑偕婦徐氏區氏咸以身殉小僕阿長亦投水死之

國朝總督佟養甲表其閭曰闔門死節之家俱同上

監生霍雲客妻崔氏御史奇觀孫女雲客早逝撫子廷祚長歷官參將丙戌王師入粵兵至三元里崔與乳母楊赴水死焉廷祚歸尋母骸不獲刺血書木主與父合葬據金通志修

王貞女騰衝軍民指揮使甯遠長女也永樂間遠始卜居白石堡嶺頭鄉已而與妻俱亡遺子貞幼穉無依女遂矢不字

廣州府志 卷一百四十二 列女一 三

撫養教誨以姊而兼父母師長焉貞成立官四川崇甯縣教諭猶時郵書誠勉之壽八旬有八終今王氏子孫繩繩歲必祭掃祖姑墓者感女之恩嚮無窮也據南海志修

義士洗灝通妻譚氏黃蕭養寇亂灝通父子捍禦有吳蕭者懷金二千自大良來眾疑為賊將執殺之譚謂其子靖曰彼若賊安攜多金可白而免之吳既免乞寄金譚令其自理賊平吳掘地取出封識宛然喜欲以半謝卻不受方賊之張也婦女來奔避者譚罄資給之咸賴存活焉

朱仕志妻黃氏少寡抱孤纔三月動遵禮法無故不出中堂時稱女君子焉嘉靖乙酉詔下所司建坊旌之仍免丁役以供侍養壽九十而終

贈主事洗灌妻陳氏性端嚴不信巫覡聞魏提學校毀淫祠

亟取先人舊奉佛像投諸水火妯娌大怖異陳曰有禍吾自當之子桂魁桂奇皆有合名桂奇舉嘉靖乙未進士官工曹改南刑曹並迎養焉後歸從湛若水講學羅浮奉母居增城菊坡之旁若水題其室曰賢母門年七十一臨終語子曰時未可出師不可負桂奇卒以理學稱蓋得之母訓云
大參陳萬言妻王氏勤儉孝敬事舅姑篤謹萬言未遇時窘甚王減餐以奉舅姑姑憐之恒與均王弗安陰於已食器內覆碟焉蓋欲盈缶以當姑意也萬言偶覺詰其故王曰每炊不過米小升能飽舅姑及君與妾乎年來如此君請思之萬言默默乃知其苦心迫歷華要弗獲同享時念王未嘗不泣然潛涕矣

戴綺妻鄒氏方娠而孀哀毀踰禮既生遺腹子晟父母憫其廣州府志卷一百四十二 列女一 三

少勸之他適鄒截髮自誓守節三十七年卒巡按御史姚虞銘其墓

陳熙昌妻朱氏明閣部陳子壯之母夔州知府朱讓之女也夫以鄉試第一登甲科子以第三人及第不色喜及夫居諫垣子典鄉試並以忤閣削籍亦不色愠江南破子壯微服出聚寶門過杭州陳華宇家得太后旨合星馳還粵集旅勤王乃間關抵家母曰南京破吾以汝爲死矣今福王何在汝何緣獨歸子壯述所由氏勉之曰盡忠卽以盡孝汝無以我故藉口也丙戌閩粵兩藩俱沒子壯受永明王大學士督師之命以丁亥六月與舅子朱實蓮起兵氏亦盡斥金釵犒士及義師再攻廣州不克子壯被執殉節廣州氏不哭曰兒獲死所矣吾家世受國恩非是無以報從容入室投繯而絕時丁

亥十二月也乾隆四十一年崇祀節孝祠俱同上

國朝

盧健吾妻李氏生一男一女夫適粵西卒時李年二十三矢

志守節順治庚寅年百歲沐浴隱几無疾而終據郝通志修

陳妙雲別駕錫爵季女幼穎悟能文許聘區荆琦荆琦病卒

陳未及笄歸區守節殯葬舅姑教子成名謝文墨卻裝飾足

不履闕總督佟養甲取其屋織造鄰里上其苦節因旌之曰

閨媛奇節時年六十六同上

方齋姑明少保方獻夫元孫女也性慧能讀書與寡嫂同居

順治庚寅兩藩入粵屯兵北郊齋姑恐遭掠與嫂同赴水死

翼日屍浮面如生鄉人葬之據張府志修

潘士桐妻徐氏明刑部尙書兆魁女刑部尙書濬子婦也士

廣州府志 卷一百四十二 列女一 四

桐性豪放徐苦勸力學奉翁姑克盡孝敬翁歿姑年邁兩目

失明疾篤徐刳臂啖姑又日舐姑目目重光疾亦旋愈總督

佟養甲知府陸元機皆榜其孝以風同上

黃河妻程氏順治癸巳為賊所掠欲汚之程曰可殺不可辱

罵不絕口賊殺於石湖塘聞者傷之據金府志修

金有庫妻白氏年二十二有庫死守節不字又尙之忠妻孔

氏之忠死矢志孀居李天祐妻馬氏夫卒堅貞自守三婦皆

平藩下康熙六年題旌

誥封奉政大夫舒尙孟妻殷氏歸數載而孀事翁克盡婦道

撫姪雲虎為平藩下拖沙喇哈番未幾雲虎復卒婦姚氏事

姑極孝姑孀守自少至老人無間言稱一門雙節康熙六

年建坊俱同上

阮氏子妻阮氏爲田家婦康熙三年遷界之役其夫挈之託
身牛泉舒雲虎家爲奴任耕作居邑城東門外有子女各一
年甚幼夫死阮先有娠徬徨哀號已念身爲人奴年少艾恐
不免乃閉戶自縊鄰媪救之甦他日赴水死據郝通志修

徐尙友妻周氏平藩管餉章京拖沙喇哈番徐開先母也先
是尙友捐軀湖南周時年二十三矢志撫開先成立康熙六

年旌據金通志修

尙輔義妻胡氏故昭勇將軍尙雲虎長婦也本兗州人從夫
輔義隨征入粵順治十年夫渡海溺死胡聞訃慟哭絕食誓
死相從骨立垂斃家人勸之曰翁姑在堂菽水誰託始起治
喪及姑歿胡曰吾今從夫地下矣病不肯餌藥卒據郝通志修

郡文學馮夢蓮妻霍氏事舅姑以孝聞順治丙申歸母家適

廣州府志 卷一百四十一 列女一 五

海寇劫鄉掠之去舟至橫流海賊逼之厲聲罵曰我尙書之
孫文學之婦豈從汝乎賊怒欲兵之引頸就刃旣而給之曰
我有女兒五歲在舟幸聽我相見卽從爾賊喜往覓霍卽躍
入海中死康熙七年旌據金通志修

梁佐卿妻關氏事舅姑以孝稱年二十五佐卿病亡父母憐
其無子欲擇配關以死誓曰惟紡績康熙癸卯鄉遭焚掠賊
逼以刃挾之偕往關大罵賊怒殺之據郝通志修

朱協蓮妻盧氏海賊掠協蓮家盧被執罵不絕口受刃而死
其妾周氏李氏媵婢張綉雲幼女媿姑以盧死咸憤不顧生

同死賊手時協蓮女十姑年十七細姑年十六賊挾之渡海
二女號泣曰吾清白閨門豈受汝辱願卽從母於地下遂奪
身赴水賊拽止旋以頭觸賊刃復嚼舌氣欲絕賊怒遂殺之

一門七烈世罕聞焉

陳冠之妻許氏舉子應選三月而夫亡父母欲令改字不從織紵贍翁姑篝燈教子應選弱冠補郡庠通歷學鄉黨稱其節孝又庠士孔貞元妻黃氏早寡家貧子幼孝事翁姑夫家四喪未舉皆賴黃紡績以辦云俱同上

林秀娘明經輝女也少嫻內則曉大義深處閨闈鄰舍罕觀其面康熙辛亥賊劫其鄉露刃逼秀娘就道秀娘堅不肯行賊縛之去秀娘罵不絕口賊鞭之詈益甚賊斫折其項棄於路是夜有虎銜復其家顏色如生據嶺海臚修

林某女蘭妹生時遍體皆蘭氣故名康熙辛亥年甫及笄與秀娘同遇賊被執賊豔其色欲污之蘭妹堅不從賊怒以刀裂其體而死其父殮屍歸與秀娘合葬於西樵寶峯下題其廣州府志卷一百四十一列女一

碣曰林氏二貞烈墓同上

靖藩下王命召妻滕氏命召隨征病卒滕哀慟不食七日死年僅十六人咸惜之康熙十三年旌據金通志修

正藍旗甲兵莫自強妻佟氏自強從征黃巖陣歿佟守節四十餘載又正紅旗兵蔡長泰妻賴氏歸九載而孀矢志守節正紅旗候選知縣劉德明妻臧氏夫卒守節四十餘年三人俱建坊旌表據郝通志修

總兵李天植妻舒氏天植以殺固山王國棟伏誅舒氏散家財執利刃呼二女至前告之曰汝與將來失節而生不如全節而死各劈其首而殞又諷令侍妾十人皆自裁乃立列於堂時康熙十九年也蓋天植罪止及身其妻節烈宜不容沒云

吳嗣聰聘妻黃氏女未婚守節事姑殯葬如禮年五十八終
又陳宏善聘妻羅氏象明女夫亡守節終身又郭爾秀聘妻
黎氏日觀女未嫁夫亡女年十五守節歷四十有八年

洗澤翹妻梁氏思魯女夫疾不起誓以死殉澤翹卒之二日
沐浴更衣從容飲藥卒又彭氏陳謙士妻年十八歸陳逾歲
夫亡整衣赴井死俱同上

潘通儒妻梁氏康熙庚申爲山賊所劫欲污之大罵不屈賊
怒剖腹而去其小姑曰媿娘亦投井而死據大清一統志修

林元隆妻鄞氏歸五載元隆病歿誓以身殉其姑防之嚴乘
間閉戶引刀自裁據郝通志修

林必登妻左氏歸四月而夫卒誓以死殉母姑咸止之俟葬
畢卽寢室自經知縣白雲客申請旌之同上

廣州府志 卷一百四十二 列女一 七

生員孔鉉妻龐氏歸十載而鉉亡龐悲號不食姑勸慰之龐
乃飲泣孀守啜淡茹素寢食於夫櫬之旁承事翁姑孝敬備
至內外無間言二十載如一日及鉉舉葬龐哀痛二月而卒

時年五十據張府志修

譚訥妻劉氏知州裔女歸半載而孀時年二十截髮矢志撫
孤父赴任亳州欲偕之往劉念翁姑在堂奉養乏人堅辭之
年七十卒子文河邑諸生

鄧輝若妻孔氏歸鄧五載夫客死蒼梧孔矢柏舟節事姑撫
子紡績度日戊子癸巳兩值歲饑勤苦養姑餽粥無缺姑病
調侍不離左右姑死拮据爲殮失足跌傷至年二十四卒
傅作梅妻林氏年十九歸傅越一月作梅亡林誓以身殉喪
葬旣畢自經死知縣左興旌以匾曰舍身就義

符元中妻李氏家極貧夫謀生於外值姑病篤藥餌無資李
禱以身代姑病果愈越數年夫故李年二十七姑老子幼仰
事俯育皆資焉家徒壁立有勸其別適者李曰失節求生死
不爲也後年七十先期謂子媳曰我明日歸矣翼日端坐無
病而逝俱同上

林芷娘父明經青年早世依孀母宋以居有鄰女不潔所私
李氏子豔芷娘色遂與鄰女謀誘芷娘至尼庵使李強狎之
芷娘不從忿欲死李懼乃已恐事洩聞芷娘受霍生翹青聘
潛播蜚語中傷之霍之父母惑焉議退婚芷娘幽憤絕食夜
遺書粧篋投池水死李益懼偕鄰女及尼逃越日俱爲豪客
支解於道事白遠近稱快據嶺南

鄧吉生聘妻譚氏之女也吉生不祿譚時年十七甘貧守節

廣州府志 卷一百四十二 列女一 六

事姑逾四十年不怠康熙二十一年旌又葉勤成聘妻盧氏

年二十三未嫁勤成卒貞守終身黃志麟聘妻梁氏志麟歿

依姑孀守以完節聞俱與盧同年旌表據郝通志修

黃望呂聘妻鄧氏女未歸而望呂卒自縊以殉同時葉光龍

妻黎氏年十五歸葉明年光龍卒舉遺腹子撫育殷勤事舅

姑克盡婦道苦節四十餘年俱康熙三十四年旌

庠士陳宗行妻何氏溧陽令龍春女也宗行早世何孀守三

十七年事老姑以孝聞誨子成立康熙戊寅旌同時羅作謀

妻何氏作謀溺於河失屍所在何奔赴欲殉屍適浮出旣殮

誓同穴姑阻之乃立繼奉姑孝慈備至又邱紹金妻劉氏年

二十五夫卒將從死以羣姑泣諭而止貞守四十餘年何松

兆妻劉氏年二十四松兆客死劉聞訃卽封髮自守食貧撫

孤苦節三十餘年並以戊寅歲旌

何體牲妻杜氏年方二十而夫故翁繼亡孀姑幼子惟杜是賴紡績以佐甘旨守節終身又張萃雄妻梁氏萃雄死於火梁奪身入烈焰妯娌持其衣止之乃孀守以終俱康熙三十八年旌

蒙帷彥妻李氏夫亡矢志自守敬事翁姑慈撫幼子孀居二十七載又黃耀型妻梁氏年二十而寡冰霜自矢撫孤有成食貧五十餘年不渝其節徐翰選妻梁氏歸徐七載翰選卒梁事姑鞠子紡績辛勤人稱完節盧崇修妻龐氏歸未一月而寡龐年十九欲以身殉姑諭止之貧苦終其身俱康熙四十年旌

潘恪賢妻馮氏年二十二而寡奉侍舅姑以婦道供子職撫

廣州府志

卷一百四十二

列女一

九

遺腹孤教之有成康熙四十二年旌又洗泉客妻黃氏泉客早卒貧而無子黃哀傷不欲生舅姑以立後大義止之拮据孀守三十餘載康熙四十四年旌

關福階聘妻易氏未歸而夫亡哭泣盡禮爲夫立嗣敬養高堂以節孝聞於鄉黨康熙四十五年旌

麥宏泰妻徐氏宏泰早卒徐矢志自守孝事翁姑慈撫孤子杜門紡績二十餘年足未嘗踰閭闕又龐宇璧妻招氏于歸甫三月而夫卒招哀泣欲殉姑慰止之立後守節以終同時麥宣馥妻黃氏孀守遺孤六齡撫之有成敬事舅姑終身不懈陳瑜文妻洗氏年二十二而寡哀傷欲絕以翁姑在堂孤兒在抱不忍言死歷苦完貞俱康熙四十七年旌

馬遠妻陳氏年二十夫亡得遺腹兒潔志孀守事舅姑

婦道以節孝聞康熙四十八年旌

梁鼎妻姚氏年三十餘早寡色養事姑義方訓子克以節終
又陳在思妻楊氏于歸四年夫亡家綦貧姑老子幼楊紡績
贍之備嘗艱苦子列膠庠八欽母訓云俱康熙四十九年旌
陳師臣聘妻莫氏未婚而師臣卒莫執婦道爲夫立後年五
十足不踰閩人鮮見其面康熙四十九年旌

吳貫之妻謝氏年二十而貫之卒謝勵志孀守敬事老姑慈
撫幼子閩里稱賢又麥齊性妻馮氏于歸二年而寡無子立
嗣事舅姑克盡婦道俱康熙五十年旌

甘作甫妻何氏年十九夫故哀毀欲殉不食者七日鄰里以
姑耄兒穉勸之而止孀守三十餘年康熙五十一年旌

何德麟妻高氏嫁四年而孀飲冰茹荼承事高堂三十餘年

廣州府志

卷一百四十二

列女一

三

如一日又羅子恆妻林氏歸二年而寡矢志靡他事姑孝養
備至及治姑喪典鬻殆盡曰毋使吾夫抱憾九泉也潘憲忠
妻彭氏年二十餘矢志守節敬奉翁姑閩里以節孝稱何相
魯妻林氏夫故哀痛欲以身殉時年僅逾二十姑泣諭止之
遂守節以終俱康熙五十一年旌

李飛鴻聘妻區氏未婚而飛鴻卒區年方十六欲殉舅姑泣
勸而止乃爲立嗣孀居三十五載以完節終康熙五十二年
旌

何光弼妻梁氏光弼早亡梁冰霜自守孝事老姑三十餘年
以壽終又張存仁妻周氏存仁早卒周潔志茹荼事翁姑撫
弱子苦節四十九載區起敬妻李氏喪夫無子李守志立嗣
事姑敬養兼備人稱賢婦俱康熙五十二年旌

方士成妻吳氏年二十一而寡代夫孝養撫孤成立守節四十餘載又梁俊客妻陸氏夫早卒上事雙親下撫穉子拮据孀守始終不渝康熙五十二年並旌焉

處士何騰兆妻梁氏于歸未幾而夫亡食貧茹苦凜節終身又李貞子妻關氏貞子卒關年甫二十許誓不更志事姑撫子孝慈備至戚里賢之張廷璉妻區氏年十九而孀無子翁姑復相繼淪沒區拮据殯殮立繼爲後苦節自守人以女丈夫稱之俱康熙五十四年旌

黎氏女許字曾翔遠未嫁而夫卒黎誓守志事舅姑克盡婦道撫繼嗣一準義方厯四十餘年完節而逝康熙五十四年旌

許海涵妻龐氏年二十許孀守清操自持和丸訓子康熙五
廣州府志 卷一百四十一 列女一 三

十五年旌又何昌文妻陳氏歸二年而寡上事翁姑得其懽心下撫弱子教之成立淬節三十餘載其旌也後於龐二年李遇榮聘妻潘氏未歸而遇榮夭潘矢爲之守父母不能拒遂執婦道立嗣子以節終康熙五十七年旌又曹槐三妻盧氏于歸數月槐三卒矢志不嫁立嗣爲後事垂白姑惟謹以節孝著聞康熙五十八年旌

庠士杜文韜妻陳氏年二十一而夫亡矢志靡他立繼守節事孀姑孝敬罔斁又經歷郭顯妻黎氏顯客死訃至黎匍匐奔赴扶櫬以歸無子爰立繼嗣矢志二十餘載俱康熙五十

九年旌俱同上

儒士何世德妻張氏年十九于歸八載世德以游學旅卒張茹淚撫孤少長遺之迎夫喪歸紡績杜門艱苦備厯年七十

四邑士聞于憲司旌獎之

據廣州貞烈傳修

馮義輯妻朱氏年二十五夫卒無子冰槩自持奉祖姑暨翁姑咸得歡心壽踰九十朱有妹適順德梅人倩夫弟芳次女適同里黃迺輔並以甘齡甘貧勵節人謂一家貞操爲朱氏

風化云

同上

羅國裕妻何氏年二十而寡遺孤方在襁褓何恩勤撫育孀守三十餘年又羅淑最妻黎氏年二十六夫亡無子黎紡績養姑立嗣延後俱旌於康熙六十一年

據郝通志修

崔雲平聘妻馮氏年十七未嫁而雲平卒馮不更適事姑立繼爲後苦節三十餘年又葉公鐸聘妻何氏女未婚而公鐸亡守節勤瘁以終周演正聘妻林氏女未婚聞夫訃誓不他居夫家苦節三十餘載俱雍正二年旌

廣州府志

卷一百四十一

列女一

三

周長曉聘妻區氏未嫁而長曉歿區斷髮以誓事舅姑撫繼子以孝慈聞又有梁氏女崔善凝未婚妻也善凝早世梁爲守節孝事翁姑慈撫繼子人欽雅操焉俱雍正二年旌

仇逸芝聘妻趙氏歸有期而夫卒於外趙矢志守擇夫兄子入繼奉事翁姑歷三十餘載孝敬無間雍正二年旌

庠生黎文朝妻潘氏年十九而孀黎君選妻潘氏年二十二而孀皆未舉子擇繼承祧事舅姑克盡婦道又梁敬天妻陸氏夫卒之死靡他食貧孝養慈撫遺孤梁同仁妻李氏年二十五失所天勤劬矢志俱雍正甲辰旌

陸卜上妻區氏年二十三夫故無子兩代遺櫬未葬區鸞簪珥匍匐以營窀穸事姑立繼鄉里稱其節孝又麥宏遜妻馮氏歸未幾夫亡家貧守志仰事俯育拮据以辦持節終其身

俱雍正二年旌

杜賢英妻梁氏賢英早卒家貧事舅姑撫孤子皆以女紅供給苦節三十九載又李朝元妻麥氏年二十一而寡事姑以孝聞撫繼嗣成立孀守四十餘年陳仲才妻招氏夫早世甫殮而姑繼亡持兩喪盡禮鄉人賢之陳崇佳妻林氏年二十七夫歿事姑撫子以孝慈著譚揆中妻麥氏年二十二而孀斷髮誓守無子擇繼焉俱雍正三年旌

趙君憲妻王氏年二十二君憲卒王孀守事姑嘗割股為羹以療姑疾節孝著聞又麥齊顯妻簡氏夫亡堅持勁節孝奉老姑歷三十六年不改其操陳宜齋妻張氏宜齋早卒張矢志事親教子嫠居四十餘載以節孝稱馮瞳妻霍氏甫歸夫卒事高堂撫藐孤備嘗艱苦一十九載以勞瘁終梁仲桂妻

廣州府志

卷一百四十二

列女一

三

孔氏夫亡矢志紡績以供甘旨苦節四十八年俱雍正四年旌

邵雲昭聘妻簡氏未婚而雲昭卒簡矢志自守事耄姑以孝聞孀居三十餘載又邵聞道聘妻陳氏年十六聞道卒陳願執婦道父母莫奪其志完節以沒齒焉俱雍正四年旌

諸生林應煇妻勞氏早寡盡禮事姑延師教子以節孝著稱又黃扶先妻陳氏屏絕鉛華自甘冰澱歷數十載勵節弗衰李錫駒妻方氏年二十七無子而嫠立繼貞守閱三十餘載麥宗翹妻譚氏宗翹早卒堂有耄親兒在襁褓艱難拮据不渝其節俱雍正四年旌

生員陳宗政妻羅氏年二十而孀事尊撫幼鄉里稱其賢同里郭德惠妻梁氏年二十七夫故無子梁擇繼以守事堂上

婦職無闕歷數十載不少衰甘子茂妻潘氏年二十三而寡撫遺腹子誓死自守善事舅姑以節孝稱林秉仁妻羅氏夫卒卽剪髮自誓舉遺腹子撫育教誨俾能成立潘宇猷妻唐氏早寡撫孤成立茹荼飲糜者三十九年俱雍正四年旌陳華祉妻李氏夫歿家貧事舅姑撫幼子悉藉女紅以給苦節三十餘年華祉弟榮祉早卒妻蘇氏亦矢志靡他孝事翁姑喪葬盡禮以完節終俱雍正四年旌

生員馮鼎昌妻練氏年二十四鼎昌卒練號泣欲殉以姑老而止朝夕執禮惟謹孀守二十七年又鄒遠平妻陳氏年二十五而孀慟欲從死姑泣諭之守節四十餘載陳隆恩妻龔氏夫亡將殉以舅姑垂暮遺稚無依延息自守歷二十八年邵池道妻簡氏歸踰年夫死遺腹孀生孀守三十餘年辛勤廣州府志

卷一百四十二

列女一

十四

拮据訓孤成立俱雍正四年旌

葉起浦妻陳氏生子僅彌月而夫亡誓死育孤荼苦備嘗貞操特著羅國洵妻何氏有子方在襁而夫亡飲泣侍姑承顏惟謹亮節弗渝又徐達偉妻龐氏早寡奉姑矢志食貧紡績以終其生俱雍正五年旌

廖航仙妻譚氏夫卒欲殉以三喪未舉遂卜兆營葬立嗣承祧同邑莫位五妻梁氏寡時夫弟甫七齡久之乃得立猶子爲夫後粹節三十九年又莫氏者潘元生妻也亦冰霜凜志擇繼延宗雍正丁未並旌焉

馬協妻勞氏家故窶而協亡馬蓋斯妻何氏腹有娠而蓋斯歿俱孝謹奉姑辛劬育子苦節歷二十餘年又陳玉聖妻王氏早失所天食貧孝養撫藐孤有成勤女紅垂老不倦黃翰

榮妻梁氏莫義長妻郭氏並事老鞠稚熒守畢生雍正五年五人皆題旌節孝

庠生譚恭侯妻劉氏廿齡寡處善事舅姑克成厥子甘貧茹苦三十七年同邑陳德先妻陸氏孀居事姑撫子勵志四十餘年霍廷橋妻鄺氏年二十一而贅舅姑相繼歿孤熒無嗣矢節五十七年並雍正丁未旌

何後然妻簡氏夫歿念孀姑垂暮欲殉而止既而兩孤繼天惟撫一孫備歷坎坷以終又鄧氏梁位伍妻也歸甫五年孀居逾四十載事舅姑能孝課子以義方馮氏羅兼三妻也二十而寡克謹婦道翁歿拔釵珥營殯具苦節垂四十年李氏甘飛塵妻也生子踰歲而飛塵卒紆紡為生奉姑不懈壽八十一潘氏黃錫庸妻也無子而錫庸死再擇嗣以撫宗祀乃

廣州府志

卷一百四十二

列女一

三

延壽七十四皆旌於雍正六年

會氏女許字鄺調元羅氏女許字李嘉齊俱弱齡聞訃矢節久而弗渝曾以姑老無依盡志承歡擇子為後羅上事舅姑下撫嗣子雍正丁未並表其貞

關朝臨妻吳氏早孀矢節與老姑幼子相依為命足不踰閭同時甘祖朋妻杜氏適祖朋五載而贅鞠子事姑克完其節李伯培妻沈氏生一子伯培卒奉舅姑以孝聞霍寅法妻李氏夫亡翁姑繼逝解簪珥完殯繼子復殯熒守以終節操尤苦云俱雍正七年旌

李啟裔聘妻陸氏女年十八將歸而啟裔殤完節五十三載奉姑立後人無間言雍正戊申旌又關氏女生員何官豹聘妻也年二十官豹亡關為守義卒年三十七

庠生黃元俊妻李氏十九于歸次年夫卒甘貧守節克盡孝慈又游達九妻羅氏年二十七達九卒羅欲殉以舅姑年耄而止立嗣孀守以終陳晉甫妻李氏甘嗣英妻高氏寡時皆年二十許李屏絕鉛華養舅姑不懈高亦以孝聞而撫孤公惠有成俱雍正八年旌表

林氏女爲強暴林文會所迫不從投井死雍正庚戌邑令劉庶獎其冰操爲請旌焉俱同上

汪烈女名喜弟父采玉歛人占籍南海喜弟生數齡父歿許字故同邑吳繼微吳尋歸歛久不復來母爲別受聘喜弟投

井死乾隆六年旌仍創祠於南海之賢樂巷據張府志修

葉敬一妻陳氏歸三載夫逝孤生纔八閱月父故愛女甚旣寡欲使常歸侍陳以舅老職當代養省父輒遊返舅病百計

廣州府志卷一百四十二 列女一

美

不食陳以舅嗜荔手擘進之遂食蓋餌荔累月而後卒云乾隆

二十八年旌卒年七十有八據吳賢湘葉節婦傳修

李阿香因逼姦不從被摺死嘉慶五年旌又烈婦謝馮氏蔡

馮氏俱以不從污辱死嘉慶七八年並旌據楷冊修

廖燕蕃妻陳氏年十八于歸七載夫亡典衣營葬矢志貞守

採桑爲活五十餘載冰操凜然自忖繼嗣無人乃以產業餘

貲悉送之祖祠屬主祠者以時展墓其厯代木主安於祠右

永奉祀焉族黨咸稱節孝據採訪冊修

羅會馨關啟妻也夫貧病賣屋營醫藥不足復議賣妻母家

償其價以計贖歸未幾夫死婦奔喪賃屋立主成服時年二

十有八富人關壽光者賢之欲聘爲繼室堅志不從艱苦守

節四十餘年嘉慶二十五年旌

廣州通判李光瑚妻蔡氏福建閩縣人隨夫任事舅姑未幾光瑚病卒無以歸櫬蔡語其嫗曰我將死之聞者或憐我之節送吾夫歸吾舅姑亦因以返里我無憾矣乃冠帔拜堂上自經死夫喪果得歸嘉慶二十二年旌俱同上

謹案阮通志云志傳列女無流寓之條然才媛節嫠無甚奇行者不傳猶可也若夫烈婦千載下將憑弔其地緬想清風焉使鵠亭之骨未歸乎故鄉磨笄之名僅聞於僑寓弗爲之傳不將久而湮沒耶爰因地附書以著其烈

顏建謀妻吳氏幼敏慧通內則列女傳諸書年二十適顏顏之先系出於閩占籍粵城西郊吳歸六載而夫亡毀容封髮事老姑鞠幼子一絲一粟咸于十指取給焉子亮洲長冠進

廣州府志

卷一百四十一

列女一

三

賢家小康姑既歿卽命奉兩世主還閩入享家廟凡閩中修祠葺墓輒敕子傾囊助而自奉雖耄年不改儉樸亮洲嘗欲進輕裘以禦寒吳蹙然曰未亡人烏用此盍以其值與我與之則立散諸戚黨之貧者其樂義好施多類此壽六十九終中丞傅公泰以早節晚榮表其閩邑令劉庶亦獎匾曰節操可風雍正十年旌後以孫時瑞貴贈恭人據南海志修蕭志崇妻谷氏能詩有靜閣草一卷余兆昌女珍玉尊玉姊妹並能詩文字畫又楊士貞女文儷陳仲微女梅庄及汪一生俱閩秀工吟咏者而文三娘則兼善琴

李一侯妻陳氏年二十適李夫病不能成禮越日卒父母陰受別聘誑之歸省至則迎者在門矣氏厲聲曰我李家婦也若何敢然迎者鳴於邑令令嘉其節資之而責其父乃毀容

屏處撫嗣子兩臣長成卒年五十二

副貢生李萼妻左氏副都御史必蕃女也性聰巧知書刺繡精妙望之如繪畫然工篆刻能以寸許玉鏤歸去來辭或前後赤壁賦細緻玲瓏人稱絕技云

邵烈女名有好平地邵邊村人也許字鹽步堡沙涌梁某梁貧甚遭疾卒女欲往守父母憐其少再受富人林氏聘已訂婚期矣女大恚思自盡女伴守之勸以溫語則佯喜防稍懈夜亟投於水其尸浮至牛欄橋止焉卽梁所居處也乃殮於河濱葬之鹽步岡時爲乾隆甲戌六月云

郭以文妻劉氏以文愚而劉美劉故安之鄰有強暴子挺友者豔劉之美而欺以文之愚也屢挑之不爲動則伺以文出徑入內寢欲逼污之劉揚聲峻拒鄰媪畢集挺友遂遁劉尋

廣州府志

卷一百四十一

列女一

天

閉門自經有司聞之上其事乃絞挺友而旌劉焉乾隆四十四三年建坊於大桐郭村

羅氏監生明俊女也年十二母病垂危旦夕禱天求以身代母遂痊及笄歸城西朱彥士彥家貧力學因致疾歷三載侍藥罔懈無何歿枕尸痛絕時舅姑皆年逾五旬傷心孫幼子亡病卧牀褥羅飲泣奉侍衣不解帶者累月迨舅姑卽世喪葬盡禮遣子耀宗就傅勤帚繡以供修脯嘉慶丁丑子又殞命與媳江氏熒熒相依其媳亦恪謹婦道砥志撫孤人稱一門雙節云道光七年旌

陳三姑九江堡應修女也幼受同鄉關某聘乾隆己酉長兄與關氏爭田關有不逞之徒斃其命時三姑年十九撫尸痛哭誓不作讐家婦遂與絕婚且翦髮偕庶母衛氏赴省鳴於

官驗已確然關故豪贍三姑困囹圄數載備受慘管嚴械而志卒不渝無如獄成竟不得直反坐之刁健發配楚北衛氏從抵荊州旋以銜沉寃憂忿卒衛乃挈骸骨而返番禺漆孝廉璘哀其志爲作翦髮操焉俱同上

謹案南海志云嶺南羣雅載翦髮操小序其事與此微異然采訪冊云實跡如是故從之

老越禧妻余氏下金甌堡人田家婦也粗蠢負大力勤操作事翁姑極孝順康熙間地方未甯多盜劫婦偶歸母家突有悍賊十數人入其鄉連劫數家婦聞之走歸赴難見姑被傷痛哭婦憤甚操田器間道出賊前若偶相值者出不意突擊之傷數人盜驚潰婦窮追賊用礮遙擊之傷其左股忍痛歸倚里門卒里人謂其能捍患也埭像廟祀之迨乾隆間廟傾

廣州府志卷一百四十一

列女一

三

圯父老猶能指其處所焉

據南海志修

朱成發妻張氏九江堡人夫家本單微以誠樸溫良爲物情所歸日漸饒裕而性喜施予氏又贊助之故產僅中貲賑卹捐題恒哀然稱首里中無賴以爲山淵之積可恣取攜也益苛索之有黃毛閩者族子行也橫行擄劫垂十年聞氏夫歸謂其從兄曰若弟富貴當犒我白金千咄嗟未能先輸五百否者白刃無親情也從兄述盜言告氏氏不動須臾夫自外返氏急出之并遣子女俱出安坐以待薄莫賊齎從兄導悍黨數十人至剝啄呼三叔甚急氏扶媪出問曰呼叔者誰何遽也叔未返有要語暫憩此相須可耳門啟盜魁昂然入踞上坐解刀置案上錚然有聲氏從容詰所以呼叔者曰捕急假數百金亡命耳餘黨俟戶外者合聲齊呼響振屋瓦氏正

色責之曰汝呼我家爲叔雖疏屬骨肉親也果有急當告我我豈愛惜區區者今乃不識親疏引外間不逞之人帶不祥之器於家門內高聲恫喝意欲何爲且汝叔不恒歸卽歸豈曰曰預爲汝謀者於是盜遽起麾止其眾曰徐之何驚人如是氏乃入室探釵珥數事并解腕中條脫益之約值十餘金陳几上曰汝將此去不足可復來何待叔也盜大慚唯唯不敢受逡巡持械出語人曰吾殺人不轉瞬出沒波濤烽火間未嘗動心今膽落於某家婦矣氏素有羸疾其將卒也偶抱恙自知不起謂諸子曰吾疇昔之夜夢易竈陞而新之夫竈者老婦之祭也婦主中饋今去故而取新吾不免矣果卒年五十四氏四子士琦道光己亥舉人次琦丁未進士官知縣明離照妻盧氏九江堡人明之綱母也鄉里有鰥寡孤獨廢廣州府志

卷一百四十一

列女一

三

汝子來汝歸去耳氏奮然作色罵賊曰上天下地吾母子行
事有不可對眾者乎有則任爾直言之吾自羞死不勞汗爾
刃若爾輩無賴作賊吾兒爲鄉紳辦賊其職也豈屑與爾爲
仇者且老婦年七十死不爲天尙何畏死我畏死我當早匿
不戴吾頭來矣爾能殺卽殺虛言恫喝何爲怒擲茶盃於地
琤然有聲賊哈愕俄而賊酋關巨至詈其衆曰鼎鑪有耳汝
無見獨無聞耶去年事微明氏母子我等爲魚久矣汝欲爲
魚乎速返之何謬妄至此賊唯唯復舁之去先是咸豐癸丑
西潦決桑園榆岸水壯猛如壞山壓雲之網多方籌策得二
千餘金遂買椿杉募泥船加工食並身立風雨中督責之竭
三晝夜力隄復完保全甚大關巨之言殆謂此也嗣後同治
丁卯戊辰等年通圍大修費鉅萬咸豐庚申土賊陳金剛率

廣州府志

卷一百四十二

列女一

三

湖南花旂賊數萬從西省竄下破賀縣破開建圍四會刺得
肇慶郡城有備而西江峽下虛無人欲乘流走南順地方之
綱集各堡紳士籌口糧募水勇雇拖罟扼要而守費亦鉅萬
皆以身任之無所避亦氏之言有以激勵之也素善養蠶於
宜忌去取之間老蠶師自以爲不及晚年仍手自經理同治
十年三月微疾而卒年八十六親友會葬者千餘人鄉族貧
人有太息泣下者固釵裙中所罕見也

俱同上

郭五姑南海捕屬人邑諸生郭瑀榮女舉人延禧妹也素聰
慧少時論語孝經皆上口稍長習女紅性孝母患痰喘繼患
瘡禱神欲以身代不効則與母易牀而寢以世言瘡有鬼祟
也及母病劇割股和藥以進又恐傷父志隱忍不言創發幾
殆逾二年父亦病女旦夕籲天請代枕席無乾時父將屬續

呼與訣女涕泗滂沱謂諸兄曰妹請代經時神不我許天道難知耶抑精誠不足格也兄等讀書宜努力以繼父志妹女人無用不能代於身前惟相從於地下耳俄而父卒女一慟幾絕頃刻復蘇遂入室投繯而死時道光廿九年閏四月十六日也縉紳等具其事請旌咸豐壬子十二月十六日得旨遂建坊於粵秀山麓入祀節孝祠據采訪冊修

廣州府志 卷一百四十二

列女一

三

南海李徵霽分纂 番禺史悠晉初校 番禺金俊基再校

南海顏以湘三校 番禺史悠乾四校

廣州府志卷一百四十二終